



E jere miserie te cjase e intal timp di frut dal pari di Ranç.

La clâf dal camarin le veve in sachete la none, di podê tignî cont e salvâ des incursions dai fruts chel fregul di robe purcine e il formadi di piore calcolât di durâ par dute la anade.

Cun di plui il pari di Ranç par nature al jere di bocje tant buine e une vore franc tal mangjâ. Si usave, in chê volte, meti i fruts in cjastîc, di cualchi lôr baronade, cul mandâju a durmî cence cene. E in cjase dal pari di Ranç cualchidun al suspietave che la buine grazie dal frut in famee, e massime a rivuart de none, e vignive dute de pôre di patî fam vie pe gnot in câs di une tâl punizion.

Ma, une sere, che nol jere propit a plomp, il frut al à dit che nol veve fam e al saltave la cene, une robone di spietâsi par fuarce la nêf il mês d'avost, cu la puare none sberlufide e cidine denant di un fat tant fûr dal ordenari che i savoltave ducj i siei conts in mert ae durade de mangjative tal so camarin sierât a clâf.

Ma ogni robe e je tornade a metisi in regule tal doman di matine, cuant che il pari di Ranç al è jevât sù dal jet come gnûf, pòlsât, vuarît e cuntune fam trascurade, pront a domandâi cun dutis lis buinis manieris ae none di metii in taule di gulizion e, par prionte, la cene de sere prime, in maniere di tornâ al so e no vê credits di sorte pal avignî.

**di Ivano Urli**  
**#991**